

Naqqiut

(Qulequtaa iluarsineqanngitsoq nassiunneqartoorsimagami aana iluarsiissutaa)

Siunnersuut uunga: Isumaginnittoqarfiup aqunneqarnera aaqqissuussaanelu pillugit Inatsisartut peqqussutaata allanngortinneqarneranik Inatsisartut inatsisaat nr. xx.xx 2016. (Isumaginninnermi malittarisassanik kommunit aqutsinerannik atorunnaarsitsineq)

(Ilaqutariinnermut, naligiissitaanermut, isumaginninnermut inatsisinillu atuutsitsinnermut Naalakkersuisunut ilaasortaq)

Akissuteqaat

(Ilaqutariinnermut, naligiissitaanermut, isumaginninnermut inatsisinillu atuutsitsinnermut Naalakkersuisunut ilaasortaq)

Aappassaaneerreqarnera

Isumaginnittoqarfiup aqunneqarnera aaqqissuussaanelu pillugu peqqussummik Ilaqutariinnermut Peqqissutsimullu Ataatsimiititaliap suliaqarsimanera Naalakkersuisut sinnerlugit qutsavigivara.

Kommunimi isumaginninnikkut inatsisinik akuerineqarsinnaanngitsumik malitsitsisoqanngitsoq nakkutilliisuutitanit malussartoqartillugu immikkuullarissumik piffissami aalajangersimasumi kommunimi isumaginnittoqarnermi inatsisitigut tamakkiisumik ilaannakortumilluunniit atorunnaarallartitsinissamik Naalakkersuisut periarfissinneqarnissaat Isumaginnittoqarfiup aqunneqarnera aaqqissuussaanelu pillugit Inatsisartut peqqussutaat pillugu allannguutissatut Inatsisartut inatsisissatut siunnersuutaanni siunertaavoq.

Inatsisitigut allannguisoqarneragut taamaallaat aaqqiisoqarsinnaanngitsoq ataatsimiititaliap isumaqarnera Naalakkersuisut isumaqatigaat.

Isumaginnittoqarnermi unammillernartut annertupput. Sulisoqarnikkut pikkorissuseqarneq amigaatigineqarpoq, suliassallu oqimaatsorujussuit suliariuminaatsorujussuillu amerlasuut sullissisup ataatsip suliarisarpai.

Matumani inatsimmut ilassutitut ilanngullugu ilinniartitaanikkut suliniutinik arlalissuarnik ilaatigut sullissinerup pioreersup nukkassarnissaa aamma najugarisami aallaaveqartumik sullissisussanik amerlisaanissaq qulakkeerniarlugu Naalakkersuisut aallarnisaareerput. Kommunini meeqqanik inuusuttunillu siunnersuisartussanik ilitersuisartussanillu Qitiusumik Siunnersuisartoqatigiinnik aallartitsisoqareerpoq, taamatuttaaq suliassat amerlassusaasa missingernissaannut misissuineq ingerlanneqarpoq, nassuiaammik UKA16-imi saqqummiussinnermik inerreqartinneqartussamik.

Kommunit qanittumik suleqatigisarnerat suleqatigiuartarnissaallu isumaginnittoqarnikkullu sulineranni sakkussaannik ikiorsertuarnissaat ineriartortitseqatigisarnissaallu Naalackersuisunit aallaaviujuarpoq. Inatsit una atorneqartariaqalissagaluarpas ataatsimiititaliap kaammattuineratuut Naalackersuisut kommunimik oqaloqateqartuassapput aaqqiissutissanillu najugarisami tamassumalu qanigisaani suliarineqartut ingerlanneqareersut aaqqiissuteqarfiginissaannut Naalackersuisunit tusaaniaqqissaartuarneqartassapput.

Siusinaartumik suliniuteqartarnerup maannamiit annertunerujussuarmik ukkatarineqarnerunissaanut taamattaaq nunatsinni meeqqanik sumiginnaasoqarnerup tungaatigut paasiniaalluni aamma ujaasilluni suliaqarnerup qulakkeerneqarnissaanik ataatsimiititaliap isumaqatigiilluni kissaateqarnera Naalackersuisut nuannaarutigivaat. Kissaat tamanna Naalackersuisut kissaataannut naapertuulluinnartuuvoq taamaalillunilu meeqqanut tapersersuisarnissaq pillugu Inatsisartut inatsisissaattut siunnersuutigineqartussami UKA16-imi saqqummiunneqartussatut pilersaarutigineqartumut ilaatinneqassalluni.

Inatsisissatut siunnersuummi matumani ilaatigut nakkutilliisuutitaasut aamma qitiusumik siunnersuisartoqatigiit nakussassarnissaat pingaartillugit sammineqassapput. Siunnersuummi nakkutilliisoqarnerup tungaatigut aalajangersakkanik ersarinnerusunik, ilaatigut nakkutilliinerup qanoq ingerlanneqartarnissaanut, piareersarneqartarnissaanut allanillu attuumassuteqartunut Naalackersuisut ersarinnerusunik aalajangersagaliornisaannut suliaqarnissaannik periarfissinneqassapput.

Naalackersuisut nuannaarutigaat ataatsimiititaliami amerlanerussuteqartunit innuttaasut inatsisitigut isumannaatsumik illersorneqarnissaat pillugu inatsisissatut siunnersuut tapersersorneqarmat, assersuutigalugu meeqqanik sumiginnaasoqarneranik nalunaarutiginnittoqartillugu kommunimi ilaginnaasoqartillugu suliaqartoqannginnerata malitsigisaanik. Inatsisissatut siunnersuutip ilaatigut qulakkiissavaa meeqqat inuusuttullu tungaatigut suliani meeqqat qitiutinneqassasut kiisalu meeqqat marloriaammik sumiginarneqassanngitsut siullermik angajoqqaanit, tullianillu kommunimi ingerlatsivimmit sumiginnaasoqartillugu.

Kommunit tusarniaanermi akissutiminni siunnersuut tapersinngilaat, soorlu aamma ataatsimiititaliami ikinnerussuteqartut tamanna pillugu isumaliutissiissutip naggataarutaani maluginiarneqarsimasutut takuneqarsinnaasoq. Kommunit isornartorsiutaat pingaarnerusumik toqqammaveqarpoq siunnersuut inatsisinut tunngaviusunut akerliummat aammalu kommunit inatsisini tunngaviusuni qulakkeerneqartumik suliassa qarfinnik aalajangersimasunik suliaqarsinnaatitaanerat pisinnaatitaaffiummat. Taamanna tunngavigalugu Naalackersuisut Kammeradvokat-imut inatsisitigut naliliisitsisimapput, Kammeradvokat-ilu inerniliivoq kommuninut suliassanik tunniunneqarsimasuni inatsisinut tunngaviusunut inatsisiliornikkut akerliunngitsumik Naalackersuisut aalajangiinissaminnut inatsisiliornikkut periarfissinneqarsinnaasut. Tamannalu aatsaat innuttaasut inatsisitigut qulakkeerneqarnissaannut akuliunnissaq pisariaqarluinnartutut isigineqarpat atortariaqarsinnaasoq nalilerneqarpat.

Naalackersuisut ajuusaarutigaat Inuit Ataqtigiit siunnersuut tapersersorusunnagu aalajangersimammata naak isumaliutissiissutip suliarineqarnerata nalaanut oqallinnermi

oqaloqatigiinnernilu Naalakkersuisut akerlianik isumaqarsorigaluaaraat. Naalakkersuisut siunnersuutikkut kissaatigaat partiit akimorlugit suleqatigiinnissaq, innuttaasut illersornissaat pillugu nalinginnaasumik soqutigisaqarneq tunngavigalugu siunnersuut akuerineqassagaluarat.

Namminersorlutik Oqartussat ilitersuusiarisartagaasa paasiuminaassinnaaneri pillugit ataatsimiititaliami ikinnerussuteqartut ernumassutaat Naalakkersuisut maluginiarpaat. Naalakkersuisut meeqqanut tapersersuisarneq pillugu inatsisartut inatsisissaanni nutaami atuutilersinneqarneranut atatillugu ilitersuutit annertuumik ukkatarineqassapput inatsisip atuutinneqarneranut tunngasortaani sulisorineqartunut tamanut atorneqarsinnaanera qulakkeerniarlugu. Ikinnerussuteqartut taamattaq nakkutilliiartorerit akulikinnerunissaannik kissateqarnertik oqaatigivaat. Tamanna nakkutilliisuutitaasut pilersinneqarnerisigut ilaatigut atuutinneqalereerpoq, meeqqanullu tapersersuisarneq pillugu Inatsisartut inatsisissaattut siunnersuummi suliniutit tamakku pitsanngornissaat ilimagineqarpoq, taamaalilluni nakkutillineq ujartuisoq sulerusussuseqartorlu ingerlanneqalereerluni.

Politikkikkut kommunimi suliassat akisussaaffinnillu agguataarinerit allanngortinnissaat Naalakkersuisut siunertarinngilaat, akerlianilli kommunit suli annertunerusumik suleqatiginissaat aamma kommunit ikiuinnerminni atortussaartinnissaannik tapersersornissaannillu pillugit suleqatiserineqarput.

Taamatut oqaaseqarlunga inatsisissatut siunnersuut Inatsisartunut suliassanngortippara.